

UCAPAN PERDANA MENTERI DI UPACARA MENERIMA HADIAH KAPAL LAYAR "PUTERA MENGKASAR" DARI RAKYAT SULAWESI DI PELABUHAN KELANG, SELANGOR PADA 1HB SEPTEMBER, 1975

Yang Mulia Tuan Haji Ahmad Lamo, Gabenor Sulawesi dan Ibu, Tuan Yang Terutama Duta Besar Republik Indonesia dan Ibu, Tuan-tuan dan puan-puan sekalian.

Hari ini adalah hari yang bersejarah dan besar maknanya kepada diri saya dan keluarga saya dan peristiwa hari ini akan menjadi ingatan kepada saya untuk selama-lamanya.

Saya mengucapkan berbanyak terima kasih kepada Pak Gabenor dan Ibu yang telah sudi datang sendiri ke Kuala Lumpur untuk menyampaikan hadiah sebuah kapal yang begini indah daripada rakyat Sulawesi kepada diri saya sendiri. Begitu juga saya mengucapkan berbanyak terima kasih kepada pegawai-pegawai dan kelasi-kelasi yang telah bersusah payah membawa kapal ini dari Indonesia ke Malaysia. Saya suka juga menyampaikan ucapan terima kasih yang amat sangat melalui Pak Gabenor kepada Paduka Yang Mulia Presiden Suharto yang bersama-sama bermurah hati untuk menyumbangkan hadiah rakyat Sulawesi ini kepada saya.

Hadiah ini besar maknanya kepada diri saya ialah disebabkan dua ratus lima puluh tahun lalu, nenek moyang saya telah meninggalkan Ujong Pandang dengan kapal yang seperti ini dan menuju ke bandar Pekan negeri Pahang dan memulakan penghidupan di situ. Dari situlah keturunan saya mula berasal sehingga hari ini dan kampung yang didiaminya ialah bernama dan masih dinamakan Kampung Makasar.


Oleh itu pemberian rakyat Sulawesi ini adalah membaharui sejarah dan membaharui ikatan persaudaraan saya dengan rakyat Ujong Pandang dan Wilayah Sulawesi amnya dengan saya dan keluarga saya sendiri. Saya harap hadiah kapal ini tidak bermakna rakyat Sulawesi berkehendakkan saya dan keluarga balik semula ke Sulawesi dengan kapal tetapi saya akan menggunakan

kapal ini untuk berehat dan juga belayar di lautan pantai timur dan barat Malaysia dan dengan itu akan mengekalkan kenang-kenangan dan budi pekerti yang saya tidak dapat nilaikan daripada Pak Gabenor dan juga rakyat Sulawesi terhadap diri saya dan keluarga saya.

Saya sendiri telah berumur dan tidak dapat melayarkan kapal ini ke Sulawesi, akan tetapi anak-anak saya ada seramai lima orang. Barangkali ada di antaranya yang mempunyai semangat adventure harus boleh menggunakan kapal ini untuk mengulangi sejarah dari Pekan ke Ujong Pandang.

Sekian sahajalah saya ucapkan berbanyak terima kasih kepada Pak Gabenor dan juga rakyat Sulawesi kerana kemurahan hati mereka dan penghargaan saya yang setinggi-tingginya terhadap mereka itu.

Saya dengan segala sukacitanya menerima hadiah kapal layar Putera Makasar ini.



Y.A.B. Tun Haji Abdul Razak sewaktu menerima hadiah kapal layar "Putera Makasar" dari Gabenor Sulawesi Selatan di Pelabuhan Kelang, Selangor pada 1hb September, 1975